

## DOMINGU V TEMPU PÁSKUA NIAN – TINAN C

### TEMA

Tema fundamentál liturjia domingu n'e nian mak domin: buat ne'ebé identifika Jezús nia eskolante sira mak kapasidade atu hadomi to'o don totál moris nian.

Iha *Evanjellu*, Jezús despede ho nia eskolante sira no husik ba sira testamentu ida “ukun-fuan foun” nian: “imi hadomi malu, hanesan Ha'u hadomi imi”. Iha entrega radikál moris nian ida-ne'e mak kumpre vokasaun sarani no fó sasin ba mundu kona-ba Maromak nia domin maternu no paternu.

Iha *leitura daruak* apresenta comunidade sarani nia moris ne'ebé simu bolun atu moris iha domin. Iha difikuldade no krize nia laran, iha comunidade fraterna mak maun-alin sira hadomi malu, habiit malu, hadomi malu no fó sasin kona-ba Maromak nia domin. Ida-ne'e mak projetu ne'ebé dudu Paulo no Barnabé no proposta ida-ne'e mak sira lori, ho laran-luak, to'o iha rai-ikun Ázia Menór nian.

*Leitura daruak* apresenta mai ita meta finál ita-nia dalan nian: lalehan foun no rai foun, realizasaun utopia/mehi nian, comunidade nia oin loloos ne'ebé simu bolun atu moris iha domin.

### LEITURA I – Apóst. 14,21b-27

Ita haree iha domingu kotuk, oinsá entuziazmu misionáriu comunidade sarani Antioquia Síria nian haruka Paulo no Barnabé ba misaun no oinsá Jezús nia Liafoun Di'ak bele to'o iha rai-nusa Chipre no Ázia Menór nia...

Leitura ohin nian apresenta mai ita Paulo no Barnabé nia viajen misionária dahuluk nia konkluzau: to'o tiha iha Derbe, sira bá fali kotuk, vizita comunidade sira ne'ebé foin loke (Listra, Ícônio, Antioquia Pisídia nian no Perge) no ho roo fila fali ba sidade sira horik bá molok bá misaun. Susesu sira-ne'e akontese iha tinan sira entre 46 no 49.

### MENSAJEN

Iha testu ne'ebé propoin mai ita, ita bele haree trasu fundamentál ne'ebé marka vida no esperiênsia grupu dahuluk sarani sira-nian: entuziazmu misionáriu dahuluk sira-nian, ne'ebé fó kbiit atu hasoru no manán perigu no susar sira hodi lori ba ema hotu liafoun di'ak Kristu nia libertasaun; liafuan konsolasaun nian ne'ebé habiit fiar no tulun enfrenta persegisaun sira (vers. 22a); apoiu ne'ebé fó ba malu (vers. 23b); orasaun (vers. 23b.c).

Liuliu, testu ida-ne'e subliña ideia katak misaun la'ós obra umana de'it, maibé Maromak nia obra ida. Paulo no Barnabé nia misaun la'ós insiativa ida Kreda Antioquia nian de'it, maibé Espíritu nia asaun (kf. Act 13,2-3); Espíritu hanesan mak akompaña no gia misionáriu sira iha sira-nia ain-hakat ida-idak iha viajen. No iha-ne'e repete fali katak atór ba ema jentiu sira nia konversaun mak Maromak no la'ós ema (kf. vers. 27). Novidade ne'ebé mosu iha kontestu misaun nian mak instituisaun dirigente sira-nian ka responsavel ( “katuas” – iha gregu, “presbíteru” sira), ne'ebé mosu ba dala uluk iha Kreda la'ós Jerusalém nian. Karik sira korresponde ho “konsellu katuas” sira-nian ne'ebé lidera comunidade judaika sira. “Apóstolu sira-nia Hahalok” la esplisita funsaun dirigente no animadór sira-ne'e nian; maibé diskursu despedida nian ne'ebé Paulo halo ba katuas sira Éfeso nian parese konfia ba sira kuidadu atu

administra, hein no defende comunidade hasoru perigu internu no esternu (kf. Apóst. 20,28-31). Buat ne'ebé presiza subliña mak ne'e: ministériu sira ne'e la'ós valór absolutu, maibé sira iha tanba atu hala'o servisu ba comunidade.

## **LEITURA II – Ap 21,1-5a**

Deskreve tiha konfrontu entre Maromak no forsa sira aat nian no Maromak nia vitória final, autór “Apokalipse” nian apresenta pontu ikus istória umana nian: “rai foun no lalehan foun”; iha ne'ebá, sira ne'ebé mantein fiél ba “bibli-oan” (Jezús) sei hetan moris iha plenitude. Ne'e umanidade nia dalan nia tutun, meta ikus ita-nia istória nian.

Mundu foun ne'e hetan apresentasaun simbólika iha kuadru rua (kf. Ap 21,1-8 no 21,9-22,5). Leitura ne'ebé propoin mai ita ohin apresenta kuadru dahuluk (kuadru seluk ba domingu oin). Ne'e mak kuadru lalehan no rai foun nian – kuadru ida ne'ebé apresenta faze ikus Maromak nia obra atu hakiak foun fali no mosu ona iha Is 65,17 no iha Is 66,22. Imajen bele hetan mós iha literatura apokáliptika (kf. Henoch, 45,4-5; 91,16; 4 Esd 7,75), nune'e mós iha testu ruma Testamentu Foun nian (kf. Mt 19,28; 2 Pe 3,13).

## **MENSAJEN**

Iha kuadru dahuluk ne'e, profeta João hanaran realidade foun ne'ebé mai husi Maromak nia vitória nu'udar “Jerusalém tuun husi lalehan”. Jerusalém ba povu bíbliku mak sidade santa importante liu, fatin Maromak horik bá, espasu iha-ne'ebé Maromak nia salvasaun sei hatudu ho modu definitivu. Nune'e “Jerusalém foun” mak fatin salvasaun definitivu, fatin enkontru definitivu entre Maromak ho nia Povu.

Iha kontestu teolojia Livru Apokalipse nian, sidade foun ne'e, mak Kreda, haree nu'udar comunidade eskatolójika, nakfilak liuhusi asaun salvasaun no libertadora Maromak nian iha istória. Dehan katak nia “tuun husi lalehan” signifika dehan katak ida-ne'e realidade ida mai husi Maromak no iha orijen divina; nia mak kriaun ida Maromak nia grasa nian, don definitivu Maromak nian ba nia Povu.

Realidade foun ne'e lori orden foun no eziye atu buat tuan hotu nakfilak ba foun. Tasi, símbolu kaos molok kriaun no poténsia ne'ebé hafunu Maromak sei lakon; rai tuan nian, fatin ne'ebé haree ema nia hahalok salan nian, sei nakfilak no halo foun (vers. 1).

Bainhira realidade ne'e mosu, sei realiza *kazamentu* definitivu entre Maromak no umanidade (“noiva ne'ebé hatais furak ba espozu”). Iha linguajen profétika, kazamentu mak símbolu ida privilejiadu aliansa nian. Kazamentu mak ideál aliansa nian (kf. Jer 31,33-38; Ez 37,27): Maromak no nia Povu halo sai realidade istória intimidade no komuñan nian; Maromak sei hela metin iha nia Povu nia leet, hanesan noivu sai ida de'it ho nia noiva no partilla moris no domin. Istória naruk domin nian entre Maromak no nia Povu sai istória ida domin nian ho final ksolok nian. Husi loron ne'e terus, matan-been, sofrimentu no mate sei bandu tiha husi ema no sei hela mak ksolok, armonia no moris rohan-laek.

## **EVANJELLU – Jo 13,31-33a.34-35**

Ita iha faze final istória “Messias” nian iha mundu ne'e. Besik daudaun ona “Oras”, momentu iha ne'ebé atu mosu mai Ema Foun no comunidade foun ida.

Kontestu pasajen ne'e nian mak han-kalan ida, iha-ne'ebé Jezús despede ho nia eskolante sira no husik ba sira rekomendasaun ikus. Jezús foin fase nia eskolante sira nia ain (kf. Jo 13,1-20) nia fó sai ba comunidade kona-ba sira ida ne'ebé atu faan Nia (kf. Jo 13,21-30); iha

kuadru sira-ne'e, nia domin prezente nafatin (nu'udar servisu simples no haraik an iha epizódiu fase ain nian no domin ne'ebé la julga, la kondena, la limita liberdade no bá hasoru inimigu mortál, iha referénsia ba Judas, traidór). Tuir mai, Jezús dirije ba nia eskolante sira liafuan despedida nian: ninia testamentu ikus. Ne'e mak momentu solene liu: nia moris to'o ona rohan no presiza fó hanoin ba eskolante sira buat ne'ebé fundamentál liu iha proposta kristán nia laran.

### *MENSAJEN*

Testu fahe ba parte rua. Iha parte dahuluk (vers. 31-32), Jezús interpreta Judas ne'ebé foin sai husi sala ne'ebé grupu halibur bá, atu entrega "mestre" ba funu-balu sira.

Nune'e, mate mak realidade ida besik ona... Jezús esplika, katak ninia mate iha krús mak manifestasun nia glória no Aman nia glória. Liafuan "doxa" uza iha-ne'e tradús husi ebraiku "kabod" ne'ebé bele signifika "rikusoin", "glória".

"Rikusoin", "glória" Aman no Jezús nian hatudu liuhusi domin iha saran-an totál. Aman no Jezús nia "glória" la hatudu iha triunfu espetakulár ka violénsia ne'ebé harahun ema aat sira, maibé manifesta iha saran moris, iha domin ne'ebé fó to'o rohan.

Jezús nia saran-an iha krús sei manifesta ba ema hotu Maromak nia lójika no hatudu sé mak Maromak: domin radikál, ne'ebé sai don to'o nia konsekuénsia ikus liu.

Iha parte daruak (vers. 33a.34-35) ita iha, apresentasaun "ukun-fuan foun" nian. Hahú ho espresaun "Ha'u oan sira" (vers. 33a) – ne'ebé halo ita haree emosaun boot no lori ita ba "testamentu" aman ida nian, ne'ebé besik mate, hato'o ba nia oan sira ninia sabedouria moris nian no buat ne'ebé fundamentál liu.

Nune'e, sá loos mak Jezús nia liafuan ikus, ninia hanorin fundamentál?

"Imi hadomi malu. Nu'udar Ha'u hadomi imi nune'e mós imi hadomi malu". Verbu "agapaô" ("hadomi") uza iha-ne'e define, iha João, domin nu'udar don an rasik nian, domin to'o rohan, domin ne'ebé la rai buat ida ba an rasik maibé saran an totál no absolutu. Pontu referénsia nian ba domin mak Jezús rasik ("nu'udar Ha'u hadomi imi"); hahalok rua molok (fase ain no Judas nia despedida) define kualidade Jezús nia domin nian ne'ebé nia husu ba ninia eskolante sira: "hadomi" katak simu, serví ema seluk, fó dignidade ba sira no liberdade tanba domin (fase ain), lahó limite no diskriminasaun, respeita ema seluk nia liberdade (epizódiu Judas nian). Jezús mak norma, la'ós ho liafuan maibé ho ninia hahalok sira; no oras ne'e hato'o ho liafuan sira, atu eskolante sira iha referénsia ida.

Distintivu comunidade nian mak sira-nia domin ba malu (vers. 35). Jezús nia eskolante sira la'ós depozitáriu doutrina ida nian ka ideolojia ida, ka observante lei nian, ka kumpridór ritu sira-nian; maibé sira ne'ebé, liuhusi domin ne'ebé sira fó, sira sai sinál Maromak moris nian ne'ebé hadomi. Liuhusi domin, sira sei sai iha mundu sinál Aman nian.